

咸豐縣志

地 260.199
41
124

圖
一
張



民國三年梓行

咸豐縣志

板存勸學所

咸豐縣志序

民國成立之始任官悉用土著侃承在省咸紳公推受黎副總統任命捧檄治咸甫視事苦無成規可循乃搜閱縣志披覽輿圖思得防守之要與夫民情風俗之大凡將隨地因時量為損益用為敷治張本惜於要者或畧而不詳編者又泛而無當至區域方位山川險隘輿圖率多舛誤更無足徵亟欲延聘通儒重加刪訂然又丁庶務叢集之時百廢待舉議不果行心實歉焉是年夏奉大府飭知組織臨時上級自治會都人士公推徐君煦樓出主議席遇從時始悉徐君於解組後已成新縣志十二卷及索而讀之見其體例之精辭義之當足與康氏武功志陸氏靈壽志並稱而圖

咸豐縣志

卷首

序

一

表精密如數掌文尤為近時縣志善本先得我心良用欣慰夫志乘之編纂匪特紀一邑之事蹟將備作國史之資料集縣志而一省之通志斯無缺集省志而一朝之遺事乃可考故一代之興必自成一代之史然非徧徵省縣志博採旁搜仍不足成為一代言史而昭示後世是故縣志宜隨朝代時勢逐加改訂庶於前代已事不致缺略無聞茲當鼎革之初正文獻易墜之目前清二百餘年之典章文物與其一鄉一邑之故事軼聞及今不載後必有無從徵錄之時方今政府有國史之修州邑自應有志書之輯徐君新志之作誠應時勢之需要哉考咸豐設縣雖遲開闢猶早前之宰斯土者多以苗疆目之鄙其地而非其俗舊志之修董之縣令

邑人但司分纂之責故舊志所載較諸他縣有文質詳略之殊徐君則本諸舊志廣羅遺書破前人陳腐之見啟鄉人愛國之心於疆域沿革民族進化言之綦詳其推論不合時宜各新政復能本其經驗發為偉談與近兩年試驗各流弊若合符節眼光識力高出流輩尤具江湖魏闕之思深山之中大有人在讀其志即可見其人而概其地後之規政化者猶得以土司之舊壤目今日之咸豐即侃莅咸三年回潮自到任至今自愧無一善政可入徐君之志惟三年中惴惴焉慮有負各紳推舉之雅意貽土著服官本省之羞時與徐君相晉接多獲昌言之賜幸免隕越之譏差可告薦舉諸紳而無愧他日之繼徐君續志者紀民國開創之往事述行

咸豐縣志

卷首

序

二

政司法自治各歷史侃與徐君均以鄉人當各機關之衝或亦志書中所必備之傳記秉筆者所樂據實直書者乎侃行將去咸前自治會諸紳見是志於地方文化有關公囑侃鳩資付之剞劂工竣公囑序於侃爰書修志之大略兼及侃與徐君契合之始末云是為序

中華民國三年五月吉日沔陽陳侃序

自序

予少時讀府縣志竊怪施南疆域扼楚蜀之腹心當陝黔之衝要何以多歷年所風氣自為致令有國家者羈縻視之等於荒徼蠻苗之壤也又竊怪乎正史所紀載志乘所援據亦以羈縻遠陬視之而吾施南各邑五百年內幾欲脫離荒徼蠻苗之名籍而不可得也迨更事稍久見聞較博考證較多乃知正史不盡足信而吾郡邑舊志筆削之權類由外來官吏主之卽有二巨紳老儒參預其間又蹈常襲故徒任鈔胥卒未遑博考窮搜以糾前人之誤夫內夏外夷春秋法也然以治亂之機安危所繫不得已於邊鄙列邦偶寓外之之意至若同處內地之中

咸豐縣志

卷一

自序

一

未負猾夏之咎無端書蠻書苗肆其尊己卑人是丹非素之筆鋒此吾國膚淺文士之陋習實不足以稱信史而為博雅通儒所竊笑也吾鄉自巴國啟宇武陵設郡久躋開明之列迨至烏飛置縣安定置州散毛置府大田置所駸駸乎日就墜闕競勝聲明文物之邦矣特中遘兵燹垂四百年溯自南渡而後神州雲擾衣冠淪於左衽文獻梗於中邦而彼北方學者奴顏婢膝嚼字咀文反攬我倔强特立不甘臣虜於翳荒之域兼以鄉中先民遺耆方且昕夕枕戈披甲協謀抵禦之不暇獨文事一途遂坐聽諸悠悠泛泛之口無或有人焉潤色鴻烈以與通都大邑爭雄明正德間童明甫先生大田所志與施州衛志並世刊

行久為吾鄉史志之鼻祖祇緣季世祝融肆虐遂致抱殘守缺全豹莫窺匪惟施之不幸抑亦吾成之大不幸也設縣以後志之者不一家蔣氏蔭亭文氏菊人宋氏古薌及予家先君子皆各有藏稿今梓行者張氏急就之本而已俊甫先生以制藝名於時惟創修志者為陝右張明府意在早觀厥成應上游之徵取而明府又以入貲得官故於分纂分校等事多假手幕吏此舊志所以詳畧不適宜而為外人所訾議也書成後先生每一念及心輒病之雖然天下郡縣多矣抗懷秦廢封建二十年以來橫覽近關輿圖二十二行省之廣所為大書特書禍棗災梨者汗牛充棟自維譎陋竊歎其中流傳較廣如潛氏臨安韓氏

朝邑康氏武功陸氏靈壽猶為操觚之士所恒言餘則寂寂罕所親聞甚哉作志之難不必斷斷為邊遠郡邑疚也且予嘗聞子輿氏之論誦詩讀書尤貴知人論世是故扶風十志不必襲龍門之八書紫陽帝蜀無庸斥涑水之尊魏矧今值光復時代奠共和國基凡所撰述尤應於紀錄之中默示更新之作用乎予愧未學不文顧念先世由吳官楚宅於茲者近五百年久欲新是志而未能繼以頻年東西奔馳日無停晷近方以虎口餘生藏拙鄉里而兩鬢不覺半凝霜矣驚魂甫定偶檢敝篋得府縣正續志並廣徵私家譜牒著述舉地方沿革之概畧政教人物之大凡不自揣量汰冗刪復為十二卷昔毛西河以蕭山人

刊蕭志之誤自顧何能敢妄效顰惟踵謬沿訛終慮負慚桑梓
約計經始於壬子夏五月脫稿於是年秋九月非敢持而問世
亦聊以償夙願所未逮立俟並時諸滿博聞風競起編墨而斧
斤之且欲聚族斯土者急起直追聿造文明優美之幸福行見
吾邑山川增色人物蒙庥庶不致俾外界通人再鄙我為荒徼
蠻苗舊疆則於不佞新志之意其庶幾乎中華民國元年十月
既望徐大煜煦樓甫

例言

一修志與修史不同志供考證史寓勸懲今修志於革故鼎新之後則於考證之中宜微寓勸懲之意茲編紀叙偶參論斷亦欲覽者各抒偉識共圖促進地方文明而已

一志乘裨益政治教育與土地開闢人羣進化甚有關係茲編第一第二卷誌地方緣起也第三至第五卷誌政教陳迹也第六至第九卷誌人才大凡也第十至第十一卷誌民族變遷也第十二卷雜錄舊聞備前十一卷之考證也武功志不記災異靈壽志不收釋老茲並登之匪曰好異亦聊備一格云

一縣境自周秦以來日進開明漢唐州郡兼治尤多遺蹟可考自元人入主中夏而吾施始以土司稱雄此吾鄉先輩於種族主義獨冠其他郡縣人民而特為講求者也至朱明光復省州入衛僅任各司裂土分治以殺其勢卒不能舉覃田向冉諸姓驟加翦滅亦見吾鄉人原具獨立自治之性質正無取乎強迫而奴隸之也茲特於各卷紀叙表而出之

一前清定鼎湖南北歸命較早吾鄉土流官民直至康熙二十一年始奉正朔前此風氣自為未敢遽以兵威強臨者為吾鄉人樸勇忠義之性不敢輕於嘗試也茲亦於各卷紀叙表而出之

一輿地志宜詳沿革府志雖嘗列表而於咸宣來各處不詳屬古何縣耳食者遂臆斷為古蠻苗地此大誤也童志衛所並重則施州之與大田俱有文獻可徵茲特蒐羅標明以見縣境開化較早視宣來各邑猶有優絀之判

一舊志輿圖疏畧位置舛誤茲用開方法特為審訂山水疆界村集道里一一註明雖未敢云精確自問或不至十分訛謬一舊式圖繪內外八景以及佐貳官署誠為無謂茲刪省之以歸簡易又阮氏廣東謝氏廣西二志以物產風俗附輿地卷中亦非無見茲既另立禮教財賦專門仍宜劃分以醒眉目一山水須詳經絡於形勝建置乃有關係茲編特記大略雖未

按里一一詳登較之泛記山名水名星一漏萬者似有雅鄭之別

一縣中建置本未完備近十年來微有進步茲編所登而於舊有學校善堂村集等事彌殷厚望如曰故步自封殊非紀載本意

一舊府縣志分卷標目如食貨志雜紀領款天文志附會分野典禮志徒事鈔胥名實牴牾見笑通人茲釐正之非故立異亦不苟同云爾

一舊志全縣戶口甚為疏漏近雖屢飭調查而故事奉行仍未得其實數茲所登特具概略如欲詳確應俟異日

一前清兵制窳敝不可復用茲復詳誌員額俸餉塘汛等事匪特不忘古初亦欲藉以鑑軍政得失耳

一陸軍對外警察安內東西列強成法具在惟中國土廣人稠交通不便前清混合二者以為作用民國初建一時頗難驟幾畫一故志武備仍以警察附舊制兵團之後

一官師人物表後列傳頗多增益皆確有見聞善善從長以資風勸至百年前先民遺老口碑具在公論尤孚萬不敢傳會阿好貽譏穢史

一藝文分卷原本漢書府縣志僅載詩文多首無經史子集著述以實之殊乖體例茲刪去列文苑諸傳至有關地方風教

咸豐縣志 卷一 例言

掌故之文字仍附錄其他各卷中亦期無戾史法而已

一縣境自元明以來土流間治每為外人所藉口茲詳記始末亦見田橫荒島尉佗南粵非特無損名譽益足增色鄉邦

一土司嫡裔徙籍武漢譜牒無存舊府縣志紀錄亦甚缺略茲所補入遺漏仍多然較舊志斷爛雜收尚有頭緒

一近世講求殖民政策不遺餘力喧賓奪主識者憂之縣境人民因時遞嬗衰旺各殊茲特創登氏族一志亦欲宅斯土者

羣知優勝劣敗天演公理庶各及早奮發期與山邑土地長存

一縣境數經兵燹公私圖籍散佚過甚茲所考摭除正史外凡

採自童氏景大田所志宋氏鼇李氏宗汾羅氏德崑何氏遠
鑒雷氏春沼尹氏壽衡施南府志張氏光杰縣志刻本家奉
政府君縣志稿本更蒐羅旁鄰郡縣志及私家譜牒著作但
使闕涉縣中重要案件壹是收錄至影響傳譌繁文浮藻無
裨政教者概不濫登

一書成於一手稿脫以四月網羅未備時期過促毛舉急就紕
繆難免博雅君子諒而教之感甚幸甚

咸豐縣志目錄

卷一 輿地志

沿革 附表疆域附圖 山川 要隘 古蹟

卷二 建置志

治城 公署 倉庫 學校 善堂 村集

津梁 舖遞

卷三 禮教志

典禮 壇廟 宗教 寺觀 風俗

卷四 財賦志

戶口 田賦 物產 雜稅 領款 蠲卹

咸豐縣志 卷一 目錄

八

卷五 武備志

歷代兵事 綠營舊制 俸餉 塘汛 團練 警察

卷六 官師志

文職表 武職表 官師列傳

卷七 選舉志

貢舉表 孝廉方正武舉附 仕籍表 武職封贈世襲附

卷八 人物志

列傳 孝友 忠武 義行

卷九 人物志

列傳 文苑 列女

卷十 土司志

列傳

金崗安撫司

龍潭安撫司

唐崖長官司

元明以來土司紀畧

前清改土歸流緣起

卷十一 氏族志

列傳

土家

官家

商家

卷十二 雜志

咸豐縣志

卷一 目錄

九